

خَطِ يَهُودَا

پیشگفتار

خَطِ يَهُودَا بَلَدِه ازی نوشته شُدِه که ایماندارا ره دَ بارِه راه-و- رفتارِ کسای باخبر کُنه که خود ره ایماندار مُوگفت، ولے نَبُود. اُو امچنان تاکید مونه که امو رقم کسا حتماً محکوم موشه. امزی خاطر اُو ایماندارا ره تشویق مونه که بَلَدِه نِگاه کدون ایمان و عقیده خُو که یگ دَفعه دَ ایماندارا دده شُدِه، سخت کوشش کنه و اُستوار و پایدار بُمنه.

فهرستِ عنوانها

دُعا و سلام (آیه ۱)

باخبر کدو دَ بارِه مردُمای بے خُدا (۳)

اخطارها و نصیحت های آخر (۱۷)

حمد-و-ثنا دَ خُدا (۲۴)

۱ از طرفِ یهُودا غلامِ عیسیٰ مسیح و برارِ یعقوب بلده کوی
شده های که دَ نظرِ خُدا یعنی آتِه آسمانی دوست-دشتنی آسته
و دَ عیسیٰ مسیح حِفْظِ شُده: ۲ رَحْمَت، سِلامتی و مُحَبَّتِ پَریمو
نصیب شُمو شُنه.

باخبر کدو دَ باره مردُمای بے خُدا

۳ آی عزیزا، ما کلو شوق دَشْتُم دَ باره نجاتی بلده شُمو نوشته
کنُم که پگ مو دَزُو شَرِیکِ آستی، مگم دَ عینِ وخت لازم
دَنِسْتُم که چند خط نوشته کده شُمو ره تشویق کنُم تا دَ باره
ایمانی که یگ بار بلده همیشه دَ مُقَدَّسین دده شُد، سخت کار
کنید. ۴ چون بعضی کسا تاشکی دَ بَینِ شُمو جای گِرِفْتِه که از
قدیم محکومیتِ ازوا پیشِ بَینی شُده. اونا مردُمای بے خُدا آسته
که پیغامِ فیضِ خُدای مو ره بلده فسق-و-فساد خُو کَجِ معنی
مونه و یگانه بادار و مولای مو عیسیٰ مسیح ره انکار مونه.

۵ اگرچه شُمو ازی چیزا باخبر آستید، ولے میخایم دَ یاد شُمو
بیرم که خُداوند قومِ اسرائیل ره از سرزمینِ مصر نجات دَد،

مگم بعد از یگ زمان کسای ره که ایمان نورد نابود کد.

۶ امی رقم ملایکه های که مقام خو ره نگاه نکد، بلکه جایگاه مناسب خو ره ایله کد، خدا اونا ره د زنجیرای ابدی د تربکی تیره بلده قضاوت د روز بزرگ نگاه کده. ۷ د امزی رقم سدوم و عموره و آغیلای گردوبر شی که مثل ازوا خود ره تسلیم فساد اخلاقی کد و پشت جنس غیر طبیعی رفت، د عنوان نمونه عبرت د آتش ابدی سوخته و جزا دیده موره.

۸ لیکن باوجود ازی، امی کسای ام که خاو دیده موره، جسم های خو ره نجس مونه و قدرت-و-اختیار الهی ره رد کده د ضد حکمرانای آسمانی کفرگویی مونه، ۹ د حالیکه حتی میکائیل، ملایکه اعظم، و ختیکه د باره جسد موسی قد ابلیس جر-و-بحث موکد، جرأت نکد که او ره محکوم د کفرگویی کنه، بلکه گفت: "خداوند تو ره سرزنش کنه!" ۱۰ لیکن ای مردم د ضد چیزای که نموفامه بدگویی مونه و د وسیله چیزای نابود موشه که اونا ره رقم حیوانای بے وقوف طبیعتاً موفامه. ۱۱ وای د حال ازوا، چراکه اونا د راه قائن نابود شده. ۱۲ امی آدما د مهمانی های پُر محبت شمو رقم مار های منه استین آسته که بے پروا قد شمو سر دسترخو ششته خودون ره سیر

مُونه. اونا مِثِلِ اُورِ هَای بے بارِشِ اَسْتِه کِه دَ وَسِیْلَه باد بُرْدِه
مُوشه؛ اونا رِقْمِ دِرِخْتایِ تِیرْمَاهی بے میوه اَسْتِه کِه کَامِلاً مُرْدِه
و از رِیشِه کَنْدِه شُدِه. ^{۱۳} اونا جَلِپِه هَای سِرکَشِ دِرِیا اَسْتِه کِه
رَسَوایی خُو رِه رِقْمِ قَفِ اَلّی بَالِه بُرْمُونِه و سِتارِه هَای سِرگَرْدو
اَسْتِه کِه تَرِیکِی تِیرِه تا اَبَدِ بَلْدِه ازوا مُقَرَّر شُدِه.

^{۱۴} دَ بَارِه اَمْرِیا حَنُوخِ هَفْتُمِینِ نَسْلِ اَدَمِ پِیشْگویی کَدِه کُفْت: ”
اینه، خُداوند قَدِ هِزارانِ هِزارِ مُقَدَّسِینِ خُو مِییه ^{۱۵} تا دَ بَلِه
پِگِ قِضاوَتِ کُنِه و تَمَامِ بے خُداها رِه بَخاطِرِ تَمَامِ کارایِ
بے خُدایی کِه اونا دَ مُطابِقِ بے خُدایی خُو کَدِه و بَخاطِرِ پِگِ
تورایِ زِشْتِ کِه گُناهِکارایِ بے خُدا دَ ضِدِ اَزُو کُفْتِه، مَحکُومِ
کُنِه. ” ^{۱۶} اَمِیا کَسایِ اَسْتِه کِه نِقِ نِقِ و شِکایتِ مُونِه و مُطابِقِ
خَاهِشَاتِ نَفْسِ خُو رِفْتارِ مُوکُنِه. اَمِیا تورایِ کُنِه کُنِه مُوگیه و
دَ پِیشِ مَرْدُمِ بَخاطِرِ فایِدِه خُو چاپلُوسی مُوکُنِه.

اخطارها و نصیحت های آخر

^{۱۷} مِگَمِ شُمُو اَی عَزِیزا، تورایِ رِه کِه رَسُولایِ مَوْلایِ مو
عِیسیٰ مِسیحِ پِیشْگویی کَدِ دَ یَادِ دَشْتِه بَشِید، ^{۱۸} چُونِ اونا دَز
شُمُو کُفْتِه: ” دَ زَمَانِ اَخِرِ مَرْدُمایِ رِیشْخَنْدِگَرِ مِییه کِه مُطابِقِ

خَاهِشَاتِ بے خُدایِ خُو رفتار مُونه. ”^{۱۹} امیا کسای آسته که دَ مینکل شُمو تفرقه میندزه؛ امیا مردُمای نَفسانی آسته که روح خُدا دَز شی و جُود ندره.

^{۲۰} مگم شُمو، آی عزیزا، خودون ره دَ وسیله ایمانِ بے اندازه مُقَدَّس خُو آباد کُنید و دَ هِدایتِ روحِ اَلْقُدس دُعا کُنید ^{۲۱} و خودون ره دَ مُحَبَّتِ خُدا نِگاه کده چیم دَ راهِ رَحْمَتِ مَوْلایِ مو عیسیٰ مَسِیحِ بَشِید که شُمو ره دَ زندگی اَبَدی راهنُمایی مُونه. ^{۲۲} دَ حَقِ کسای که دِل-و-نادِل آسته دِلسوز بَشِید. ^{۲۳} بعضی ها ره از آتِش بُر کده نِجات بَدید؛ دَ بعضی های دِیگه قد ترس، مِهْربانی کُنید، لیکِن دَ عینِ حال، از کالای که قد جِسْم های ازوا اَلْوَدِه شُدِه نَفَرَت کُنید.

حمد-و-ثنا دَ خُدا

^{۲۴} آلی دَ خُدای که مِیْتَنه شُمو ره از اُفْتَدو نِگاه کُنه و شُمو ره بے عیب و خوشحال دَ حُضُورِ پُر جلالِ خُو قرار بَدیه، ^{۲۵} یعنی دَ خُدای یکتا و نِجات دِهِنده مو، دَ وسیله عیسیٰ مَسِیحِ مَوْلایِ مو، از اَزَل تا آلی و تا اَبَد اَلْاَباد، بُزُرگی-و-جلال، شِکوه، قُدْرَت و اِخْتِیار باد. آمین.

سوال داريد؟ +1 807.700.6090 

آزرگي © afghanbibles.org

Copyrighted material not for reprint/publishing purposes.